



## Universitätsbibliothek Paderborn

**De Orationibvs Iaculatoriis Libri IV. Ascetici, Seu ad  
exercitationem spectantes**

**Balinghem, Antoine de  
Antverpiae, 1618**

Cap. X. Admodum Deo gratas esse aspirationes circa peccata probatur  
exemplo.

[urn:nbn:de:hbz:466:1-51085](#)

ferreo vel plumbi laminâ & celte sculpamus Iob 19.  
in silice cordis nostri: dicatur de nobis, licet <sup>24.</sup>  
dispari longè sensu, peccatum eorum scri-  
ptum est stylo ferreo in vngue adamantino Iere. 17.  
& exaratū super latitudinem cordis eorum,  
videlicet ut ea semper habeamus ob oculos,  
neceorum memoriā deponamus vñquam,  
sed in ijs cogitandis toti simus, quoād audi-  
tui nostro det Deus gaudium & lētitiam, di-  
cātque; fili remittuntur tibi peccata tua: Va-  
de in pace, & amplius noli peccare.

## C A P V T X.

*Admodum Deo gratas esse has aspira-  
tiones circa peccata, probatur  
exemplo.*

**T**HAIDEM Alexandrinam Paphnutijab- In vitis  
PP.  
batis operâ & cohortatione ad Deum  
cōuersam, accepimus, ea omnia quæ mere-  
tricio sibi quæstu parasset in foro congesta,  
frequētissimâ spe cōstāte & stupente multitu-  
dine combussisse, eiusdēmque Abbatis con-  
silio feminarum monasterium ingressam,  
cellâ se inclusisse, ibique continenter & sine  
intermissione antea&tæ vitæ sordes lacrymis  
eluisse, solōque pane & aqua vitam susten-  
tante corpus inediâ macerasse. Cūmque ab

E 2

ea

ea digrederetur sanctus Abbas, quæsiisse ex eo ut traderet sibi orandi certam aliquam rationem, quam teneret deinceps. cui Paphnutius. Cœue ausis impurâ lingua, oréque ob-scœno tuo, atque tot turpitudinum fœditate inquinatissimo, usurpare Sanctum Dei nomen. Hæc autem tibi erit postquam procederis in genua orientem versus, oratio. *Qui plasmati me miserere mei*, huiusque orationis assidua repetitione diem noctemque consumes. Accuratè illa quidem obsecuta est Sancto Abbatu, neque ausa toto triennio sacro-sanctum Dei nomen proferre: nimurum una erat ei cura & cogitatio delendorum peccatorum, in idque toto pectore incumbēs supplicibus votis Dei efflagitabat opem, à cuius etiam nomine præ reuerentia abstinebat, aliud interea nihil animo, nihil ore agitans, quām quod sibi præscriptum erat. *Qui plasmati me miserere mei*: tali autem labore & prece exacto triennio visum est Paphnutio magnum Antonium consulere, an sua essent huic pœnitenti condonata crimina: Itaque magno Antonius religiosorum cœtu in vnu coacto, iubet eos noctem insomnem ducre, orationique vigilantes instare, vt cuius rei sciscitandæ, cognoscendæq; causa venerat Paphnutius eam diuina bonitas patefacere dignaretur. Dum fit vt iussum erat, ecce tibi Paulum, sancti Antonij discipulorum

omnium

omnium facilè principem, qui cælum suspi-  
ciens, eretum ibi cubile auro gemmisque  
præfulgens miratur, erat id cùm magnitudi-  
ne nobile, tum artis varietate distinctum, ad  
cuius custodiam quasi excubabant quatuor  
augustâ specie & miri decoris puellæ virgi-  
nes. Interea dum oculos tam iucundo tam-  
quæ insolito pascit aspectu, venit ei in men-  
tem cogitare, nulli alteri instructum illud  
regium cubile, quâm magistro suo Antonio,  
quo quidem aut virtute præstantiorem, aut  
meritis superiorem sciebat neminem. Inter  
hæc, voce de cælo delapsa monetur, non  
Antonio hanc gloriam, at Thaidi meretrici  
pię paratam. Quintodecimo itaque die post,  
cùm vitâ decepsit sancta peccatrix, ad cæle-  
stes amplexus & nuptias Agni, euocata cæ-  
lestis huiuscē thalami facta est consors.

O quâm tibi grata accidit summe Deus  
animi demissio! ô quantum placet pecca-  
torum assidua recordatio! Verè de te pro-  
nuntiauit Iudith. superbi ab initio non pla- c. 9. 16.  
cuerunt tibi, sed humilium & mansuetorum  
semper tibi placuit deprecatio. Verè psal-  
mographus: Tu populum humilem saluum  
facies & oculos superborum humiliabis. Re- Psalm. 17.  
spicis in orationem humilium, & non sper- 28.  
nis preces eorum. Quis sicut Dominus Deus Psalm.  
noster qui in altis habitat, & humilia respi- 101. 18.  
cit in cælo & in terra? Verè de te cecinit

E 3 Iobus

c.5.ii.

Iobus. qui ponit humiles in sublime & mōrentes erigit sospitate. Quæ autem maior humilitas, aut quódnam illius illustrius argumentum, quām toto vitæ tempore perpetuò figere obtutus in miseriam suam, suāque facinora? quām numquam superfedere laboriosa hac & molesta fānē cogitatione? quām continenter Dei misericordiam, suppresso præ reuerentia eius nomine, implorare? Se ream, se omni supplicio dignissimam, nocte dieque in clamare? Iacere in puluere? squallorēque & situ marcere, & carcere cōclusam, vitam aqua & pane egrē tenere?

Sed non abiēre hæc omnia sine amplissima mercede. Quām breuem triennij laborem, quām longum quietis tempus est consecutum! quid per breue triennium ad æternitatem quæ finem nescit? quæ nullo circumscribitur aut clauditur termino? Quām momentaneum & leue tribulationis ipsius, quām eternum gloriæ pondus operatum est. Et quæ Dei nomen usurpare præ humilitate & reuerentia erubuit, tenet modo calculum

Apoc. 2.  
17.Apoc.  
14.1.

candidum & in calculo nomen nouum scriptum, quod nemo scit nisi qui accipit. Habet, inquam, nomen Agni & nomen patris eius fronti suæ inscriptum, vt ab omnibus agnoscatur esse non alterius quām Dei.

O quām dispar temporum conditio & status! Veratur in hac mortali vita Deum nomi-

nominare. In illa immortali, aliud nihil habet in ore, aliud nihil in pectore: assiduè eius laudes prædicat: alias quidem cum beatis spiritibus identidem clamat, Sanctus, sanctus, sanctus Dominus Deus exercituum, plena est omnis terra gloria eius: alias vero cum quatuor & viginti senioribus. Benedictio & claritas & Sapientia & gratiarum actio, honor, virtus & fortitudo Deo nostro in saecula saeculorum. Sic mutantur vices: sed eas mutat pœnitentia, humilitas, iugisque peccatorum recordatio, longeque à vero absimus, si nos alia re acceptiores Deo fore arbitramur. Et licet magna sit humilitas, etiam à Dei nomine præ reuerentia se abstine-re, non est tamen immoderata: iusta ea est & summa cum aequitate coniuncta. Enim vero multis est nominibus indignissimus peccator, qui lingua sua tot fœdata impuritatibus, tot inquinata spurcijs, tot libidinibus deturpata, purissimum illud, sanctissimum omnique honore prosequendum Dei optimi maximi nomen proferat. In quam sententiam adduci potest illud regij varis, quo improbis interdicitur, tum præcepta & iustificationes altissimi memorare, tum patrum cum prioris testamenti patribus initum insolenter iactare. Quare (inquit) tu enarras iusticias meas, & assumis testamentum meum per ostium? Si enim improbus

E 4      Dei

Psal. 49.  
26.

Deileges institutaque enarrare, multo magis ipsum eorum auctore nominare vetabitur. Quæ quidem non sic volo accipi, quasi peccatori quantumvis impuro, impio & sceleroso nefas sit sacrosanctum Dei nomen proferre: quo id enim iure quâve ratione prohibitum? hoc tantum contendō, licet id nec sine merito & ingenti diuinæ benevolentia accessione fieri: nemo enim diffiteri potest insigne illud esse demissi animi, Deoq; subiecti argumentum, necnon illustre quâ illum prosequitur & colit obseruantia pignus & monumentum.

Atque ut concludam quidquid huc spectat: equidem existimo nihil habendum antiquius, nihil crebrius usurpandum frequenti recordatione peccatorum, & hoc affirmare possum, ut quisque huic exercitio insistat maximè, ita maximè spiritualis viri perfectionem, laudemque consequetur. Atque ut tandem plurimorum occurram querelæ (iustæ an iniustæ, modò non dispu) qui nec se orate posse, & continenter distrahi, nec suppeteret quod cogitent inter orandum assidue queruntur, hoc vnum addo. Imitentur hi, quam supra dixi sanctam peccatricem, neque mentem altis & subtilibus pascere cogitationibus, in quibus plerumque multa latet vanitas, eis sit curæ, distineantur Dei ope imploranda: humilient sese sub potenti ma-

nu

nu Altissimi; agnoscant ob multitudinem &  
grauitatem peccatorum suorum omni se bo-  
no vitâque ipsa indignos.

Et quamquam sexcenties & amplius usur-  
parint illud, de quo paulo antè. Qui plas-  
masti me, miserere mei. Iterum atque ite-  
rum eadem repeatant, intelligentque non  
capi Deum artificio orationis aptè & ele-  
ganter contextæ, neque verborum orna-  
tu diuinam maiestatem deliniri. A page ista,  
capitur autem, deuincitur, & tamquam  
irretitur humilitatis actionibus, animoque  
contrito & humiliato, qui quoties se eius  
sistit obtutibus, quamlibet easdem ingemi-  
net preces, easque sermone horrido, incul-  
to, agresti & incondito, qualis erat sanctæ  
illius peccatricis, nouerit tamen nihil se illi  
auditu iucundius exhibere posse. Verùm de  
eiusdem inter orandum repetitione sermo-  
nis, haud ita multo pòst agendum.

## E S CAPVT